

**A**ndan na pátria de Goethe barallando a posibilidade de reformar a ortografía alemana e recentemente a lingua danesa admitiu cámbios que afectan á súa grafía. Os idiomas son entes vivos e as convencións normativas en materia lingüística están suxeitas —como non, baseando-se na tradición e na ciencia— a evolución, adaptación, cámbio, reforma ou, se for o caso, rectificación.

A situación actual do galego esixe, ao meu ver, unha evolución, un progreso, unha modernización ou universalización da súa ortografía. Desde a raíz histórica á estrita aportación científico-lingüística e pedagóxica, pasando polo sentido de adaptación á realidade, visión da cultura e do futuro incluídos.

¿Falarían diso o outro día o presidente da Xunta e o doutor Honoris Causa pola Universidade de Santiago, Mário Soares? O presidente de Portugal falou, si, das relacións culturais e dos lazos lingüísticos entre a Galiza e o país irmán e mesmo citou a don Ricardo Carvalho Calero, sábio polígrafo de nós. E tamén o presidente da Xunta se ten referido nalgunha ocasión á comunidade lingüística existente entre Tui e Valença. ¿Entón?

Asistimos hoxe a un progresivo e xa caótico ensarillamento de erros de todo tipo no galego utilizado por locutores, estudantes, actores, xornalistas, escritores, novos falantes, etc., porque, entre outras cousas, a normativa oficial actual do idioma revela-se insatisfactoria, pedagogicamente confusa, rixida e nalguns dos seus puntos (vexa-se, por exemplo, a chamada 2ª forma do artigo caprichosa, capciosa e teimosa. Pasados xa bastantes anos da súa posta en curso

vemos como esta opción non ten pleno éxito, non se impón; é máis, provoca rexeitamento expreso ou tácito por parte de amplos sectores da sociedade.

¿A solución? Consensuar. Avanzar. Universalizar. Que non teña que dicir Mariño Soares que lle é máis doado ler o castelán que o galego. Ou como expresava o admirado Camilo Gonsar días atrás: “A comunicación entre Galiza e Portugal debería ser cada vez maior. Entón, idiomáticamente debería tender-se tamén a unha maior comunicación das dúas linguas. (...) Penso que, sendo fieis ao galego maioritariamente fala-

do, habería que modificar a grafía para que fose lexível no mundo luso-brasileiro.

O autor de ‘Cara Times Square’ manifesta-se así partidario de introducir variantes na actual normativa oficial do

## Reforma ortográfica

*É urxente pór en marcha unha reforma ortográfica do galego, é preciso unha normativa oficial renovada. A árbore, é de lei, ten que dar flor galego-portuguesa. Ou sexa, máis nosa, máis do pai Miño*



galego, mesmo aceptar o uso dos dígrafos ‘nh’ e ‘lh’. Velaí. Convén perder o medo ás raíces. E tamén ao fruto. Non é bon coutar o movemento intelixente da seiva. Non é bon petrificar-se no tronco. Digamo-lo claramente e tomen nota interesados e responsábeis: É urxente pór en marcha unha reforma ortográfica do galego, é preciso unha normativa oficial renovada. A árbore, é de lei, ten que dar flor galego-portuguesa. Ou sexa, máis nosa, máis do pai Miño. Antes de que a ‘contaminación’ queime a semente aínda viva e impida universalizar o sabor propio e brillante da nosa fala.